

Marzi Strassolt di Grafemberc Une vite tra la statistiche e il Friûl (1939-2017)

G I A N P I E T R O Z A C C O M E R , M A R I A R O S I T A C A G N I N A

Marzi Strassolt di Grafemberc, nassût a Gurize ai 23 di Dicembar dal 1939, al complete il periodi di istruzion secondarie a Rome tal 1958, dulà che si iscrîf ae facoltât di Economie e Cumierç. Daspò di un periodi come publicist te capitâl, al va cu la famee a Napoli e li si iscrîf ae universitât, par po passâ a chê di Triest, dulà che al cjaparà la lauree in Economie e Cumierç tal an academic 1966-1967, cuntune tesi in Gjeografie Economiche sui problemis di analisi teritoriâl, teme che al restarà une des sôs plui grandis passions. La tesi e sarà po publicade de Cjamare di Cumierç di Udin.

Subit dopo jessisi laureât al jentre intun grop di ricercje interdissiplinâr CNR cun a cjâf i Istitûts di Economie e Matematiche Finanziarie de Universitât di Triest e di Urbanistiche de Universitât di Rome. Dilunc di cheste ativitât di ricercje, che e veve il fin di costruî un model di politiche teritoriâl, al tache a studiâ a font i metodis statistics e i modei econometrics aplicâts a problemis teritoriâi.

Tal an academic 1968-1969 al cjape une borse di studi dal Ministeri de Istruzion Publiche par zovins laureâts. Nomenât assistent incargât te catedre di Statistiche de Facoltât di Economie e Cumierç de Universitât di Triest, al tache la sô colaborazion aes ativitâts didatichis e di ricercje dal Istitût di Statistiche.

Tal mê di Mai dal 1969, daspò di vê vinçût un concurs public, al ven nomenât assistent ordenari te catedre di Statistiche te Facoltât di Economie e Cumierç, dulà che tai agns Setante al tache a insegnâ e al passe di rûl.

Tal imprin la sô ricercje si indrece soledut al probleme de cualitât des fonts, o ben de valutazion critiche de documentazion statistiche

che e esistevê in chei agns e des sôs relativis aplicazions, simpri cun chê di analizâ i fenomens economics a nivel teritoriâl. Colegâts a chest indirîç di ricercje a son i lavôrs che a considerin la componente demografiche come fatôr che al condiziona la situazion economiche tai singui teritoris: al è un esam critic dai risultâts di cualchi esperienze di prevision demografiche e di une analisi des carateristichis evolutivis de popolazion regionâl. Al jentre in cetancj grups di ricercje CNR e si tachin a viodi i interès sientifics che lu compagnaràn par dute la vite. In chei agns di fat al scomence lis ricercjis su la analisi de domande di istruzion superiôr che lu viodin responsabil di un proget, finanziât propit di chel che in chê volte al jere il Ministeri de Istruzion Publiche, e che al metarà lis fondis di tancj siei lavôrs sul teme sei di nature metodologjiche che aplicade. Il teme al varà une ciete impuartance regionâl pe analisi de domande di istruzion universitarie in Friûl-Vignesie Julie, prin pas pe valutazion des esigjencis e de tipologjie di ufierte de Universitât dal Friûl, che e sarès nassude li di pôc. Al è di chel periodi un altri so grant interès, chel su lis minorancis lenghistichis, disvilupât in maniere sientifiche a tacâ de partecipazion a une cunvigne internazionâl su lis minorancis, dulà che al presentà une relazion sul teme “Criteris di rilevazion statistiche des lenghis” che, slargjade e infondu-de, e deventarà il lavôr *Lenghis e nazionalitâts des rilevazions demografichis* dal 1977. Po dopo, al fronte problemis di analisi dal marcjât dal lavôr. A interès di ricercje aromai fondâts si lein gnûfs orientaments te produzion sientifiche resinte, di une bande indreçade viers temis di Contabilitât Economiche e relative stime di macroagregâts economics simpri a nivel teritoriâl sub-nazionâl, e di chê altre viers costruzions plui teorichis come prove par contribuî ae definizion di une teorie de vulnerabilitât dai sistemis economics.

Tal 1981, al devente professôr associât tal setôr di Statistiche Economiche, e po al oten l’incuadrament tal cors di lauree di Sciencis Statistichis e Atuariâls de Universitât di Triest. In chei agns al tache a coordinâ ricercjis impuartantis su lis “Flutuazions ciclichis regionâls e indicadôrs economics”, sui “Modei di stime dai redits e dai consums a nivel teritoriâl” e sui “Modei econometrics par regions esponudis al pericol di discontinuitâts ambientâls”.

Deventât professôr straordenari, tal 1987 al rive te Universitât dal Friûl, dulà che al insegne Contabilitât Economiche Nazionâl te gnove Facoltât di Siencis Economichis e Bancjariis, e al publiche il volum par Giuffrè *Contabilitât macroeconomiche e taulis input-output regionâls*.

Tal 1990 al devente diretôr dal gnûf Dipartiment di Siencis Economichis e al è nomenât prorêtôr vicjari dal retôr prof. Franco Frilli.

Tal 1992 al è elet retôr de Universitât dal Friûl.

Tal stes an, il President de Republiche i da la onorificence di Comendâtôr dal Ordin al Merit de Republiche Taliane.

Dilunc dal so retorât la sô ativitât di ricercje no si ferme. Di fat a son dai agns Novante i volums *La analisi de coniunture economiche locâl: modei, metodis e fondis informativis* e *La teorie dai numars indiçs dai presits e dai indicadôrs economics, finanziariis e sociâi* scrits in colaborazion cun altris coleghis e publicâts de Cedam. Tai agns Novante no cate i tancj impegnis istituzionâi al continue a stâi daûr ai tesiscj, disvilupant cetantis tesis sul sisteme universitari, de valutazion de ricercje e de didatiche, ai problemis di rilevazion dai carics di lavôr, ai modei di ripart dal Font di Funzionament Ordenari dai Ateneus, e il prin dotôr di ricercje de Facoltât di Economie di Udin cuntune tesi sui indiçs dai presits tal contest spaziâl. Tal 1999 al è coordinadôr de convenzion CRUI-ISTAT sul teme de Autonomie Universitarie e des rilevazions statisticis. In chei agns, la Universitât dal Friûl sot de sô vuide e vîf un periodi di cressite fuarte sedi in numar di students sedi di facoltâts. Marzi Strassolt al devente interprete e vuide di chê mission che la leç pe ricostruzion des zonis taramotadis i da al Ate-neu furlan: “contribuî al progrès civîl, sociâl e ae rinassite dal Friûl...” e deventâ imprest di disvilup e di “rinassite dai filons originâi de culture...” de lenghe, des tradizions e de storie dal Friûl. Tal 1994 al devente – e lu restarà par cetancj agns – responsabil sientific de riviste *Coniunture – Osservatori permanent de economie dal Friûl Vignesie Julie* dal CREF, uniche riviste di caratar statistic-economic a nivel academic in region che e dave no dome informazions coniunturâls sul ultin cuadrimetri, ma ancje analisis teritoriâls e setoriâls dai ambits plui impuartants de economie regionâl, cence dismenteâ i aspiets metodologjics.

Tal 1995 al è promotôr de costituzion dal CIRF, Centri Interdipartimentâl di Ricercje su la culture e la lenghe dal Friûl, e di Friuli Formazio-

ne; cualchi an dopo al costituìs, diventant president, Friuli Innovazione che e sarà la fonde dal Parc Sientific e Tecnologic. Prime di sierâ il so mandât tal 2001, daspò 9 agns ae vuide dal Ateneu, viodint lis trasformations che a jerin daûr a vignî fûr tal sisteme univeristari al publiche, insieme a altris coleghis de Univeristât di Udin, il volum *La aziende Univeristât. Lis sfidis dal cambiament* publicât di Isedi.

Tal 2001, intant che al je ancjemò retôr, al istituìs cuntun grup di coleghis la Societât Sientifiche e Tecnologiche Furlane, metint fûr la riviste sientifiche *Gjornâl Furlan des Siencis* e, cualchi an plui tart, chê di divulgazion sientifiche *Cîl e Tiere*.

Daspò il periodi passât ae vuide de Provincie di Udin come president, elet par doi mandâts, al torne te Univeristât e al torne a dedicâsi ae ativitât di insegnant e ricercjadôr, ma si impegne simpri di plui ancje tai tancj altris siei interès culturâi, tant che i cjistiei e lis architeturis fortificadis, la storie de basse furlane, la lenghe furlane, che lu ocuparan a plen daspò di jessi lâ in pension tal 2009.

Tai ultins agns si è impegnât fin insom tal disvilupâ lis ativitâts de Societât Sientifiche e Tecnologiche Furlane e te publicazion dal so ultin lavôr sientific, la monografie *Economia delle minoranze linguistiche. La tutela della diversità come valore*, publicât de Carocci, che al à presentât al public fint a cualchi di prime de sô muart subitanie.